

DOMINICA PRIMA QUADRAGESIMÆ.

EVANGELIUM. MATTH. IV.

In illo tempore, ductus est Jesus in desertum a spiritu, ut tentaretur a diabolo. Et cum jejunasset quadraginta diebus et quadraginta noctibus, postea esuriit. Et accedens tentator dixit ei : Si Filius Dei es, dic ut lapides isti panes fiant. Qui respondens, dixit : Scriptum est : Non in solo pane vivit homo, sed in omni verbo quod procedit de ore Dei. Tunc assumpsit eum diabolus in sanctam civitatem, et statuit eum super pinnaculum templi, et dixit ei : Si Filius Dei es, mitte te deorsum. Scriptum est enim, quia angelis suis mandavit de te, et in manibus tollent te, ne forte offendas ad lapidem pedem tuum. Ait illi Jesus : Rursum scriptum est : Non tentabis Dominum Deum tuum. Iterum assumpsit eum diabolus in montem excelsum valde, et ostendit ei omnia regna mundi, et gloriam eorum, et dixit ei : Hæc omnia dabo tibi, si cadens adoraveris me. Tunc dicit ei Jesus : Vade retro Satana. Scriptum est enim : Dominum Deum tuum adorabis, et illi soli servies. Tunc reliquit eum diabolus, et ecce angeli accesserunt, et ministrabant ei.

CONCIONES.

- I. Ad pugnam cum dæmone spirituales accenduntur Christiani.
- II. Bona mundi, quæ diabolus proponit vana, qualia.
- III. Quotopere dæmones metuendi ac cavendi sint.
- IV. Quadragesimæ tempus acceptabile.
- V. Motiva ad amplectendum quadragesimæ jejuniū.
- VI. Quid faciendum per quadragesimam.
- VII. De institutione jejuniorum in Ecclesia, cur certis temporibus fiant.

- VIII. Causæ præcipitantes in hæresin.
- IX. Documenta circa personam Christi.
- X. Documenta circa personam tentatoris.
- XI. Mystéria.

CONCIONES AUCTARIUM.

- I. Ad jejunandum stimuli.
- II. Carnis esus a jejunii diebus proscribendus.
- III. Concupiscentiæ triplices exterminandæ.
- IV. Dæmonum malitia in variis bestiis depingitur.
- V. Una fortunæ per quadragesimam proposita a diabolo.

CONCIO I.

AD PUGNAM CUM DEMONE SPIRITUALEM ACCENDUNTUR CHRISTIANI.

I. Animæ Dei præsentia, et inspectio. — II. Dei adiutorium. — III. Juramentum Deo præstitum. — IV. Dæmonis arrogantia et odium. — V. Diaboli imbecillitas. — VI. Corona proposita. — VII. Exemplum Christi.

THEMA.

Ductus est Jesus in desertum a spiritu, ut tentaretur a diabolo. Matth. IV.

Tota quidem hominis vita militia est super

terram, attestante Jobo, c. VII. militia, inquam, et colluctatio : Non adversus carnem et sanguinem, sed adversus rectores tenebrarum harum, contra spiritualia nequitia, ut scribit apostolus ad Ephes. VI. nullo tamen anni tempore, magis militandum videtur, quam hoc quadragesimæ, quo malignus ille hostis generis humani, potissimum prodire solet ad evertendos homines a salute sua, quam majori nunc conatu quærunt et operantur. Cujus rei imaginem vivam intueri licet in spurio illo gigante Goliatho, qui ut legimus I. Regum XVII. egressus de castris Philistinorum maximo supercilio provocabat Israelitas ex adversa parte

instantes ad certamen singulare. Procebat vero mane et vespere, et stabat quadraginta diebus, ait sacer textus. Ecce tibi typum adversarii nostri diaboli, qui in hodierno evangelio et initio jejunii prodit ad certamen, uti cum Christo, ita cum Christianis omnibus ineundum : quique per quadraginta dies esuriales quotidie nobis insultat et insidias molitur, quo nos in bonis operibus perturbet, aut ab iis revocet, quasi clamans ad nos : Itane vos Deo et non mihi potius deinceps servietis? Itane vos mihi resistere valebitis? Itane per penitentiam, jugum meum excutietis? Itane per jejuniū similiaque opera Deum vobis iratum placabitis, etc? Taceo superbiam, iram, robur, astus hujus Goliathi. Quæ omnia fortasse non immerito perturbare nos possent, nisi altera ex parte multa et magna adjumenta forent, quæ nobis animos addunt, quemadmodum et David olim addiderunt, ut cum hoste isto strenue dimicemus. Sunt autem hæc.

I. Accendere nos debet Dei agonothetæ nostri præsentia et inspectio, quemadmodum et Davidem accendere ad prælium potuit reges sui et totius exercitus Israelitici spectatio et expectatio. Sic etiam Christus spectatores pugne habuit sanctos angelos, qui post victoriam accesserunt et ministrarunt ei. At nos spectatores habemus non solum angelos, sed et mundum universum mundique Dominum, juxta id I. Corinth. IV. *Spectaculum facti sumus mundo, et angelis et hominibus.* Magnus ille athleta Antonius cum aliquando post plurima et gravissima verbera a dæmonibus accepta, subita luce collustratus et divinitus recreatus esset, diffugientibus dæmonibus, erexit se et quasi Deum præsentem cernens, dixit : *Ubi eras, bone Jesu, ubi eras? Quare non a principio adfuisti, ut sanares vulnera mea?* Stetitque audivit : *Antoni, hic eram, sed expectabam videre certamen tuum, etc.* Jam vero quis est qui nesciat quam strenue certent pugiles, cursores, cantores aliique, cum advertunt spectari se a rege et magnatibus? Augustus Cæsar moriturus quæsivit ex amicis circumstantibus : *Satisne commode personam nostram in theatro egimus?* Illis respondentibus : *Commode : Valet igitur,* inquit, *et plaudite,* Sueton. in Aug. Quanto majus ergo nobis solatium erit, si in mortis articulo audituri sumus, nos in hoc mundi theatro personas nostras strenue egisse? Quam ibi applaudent angeli et tota cœli curia? Audiamus B. Agatham ita de suo certamine loquentem in breviario Romano : « Vidisti Domine, et spectasti agonem meum, quomodo pugnavi in stadio; sed quia nolui obedire mandatis principum, jussa sum in mammilla torqueri. Domine, qui me custodisti ab

infantia, qui abstulisti a me amorem sæculi, qui me carnificum tormentis superiorem præstitisti, accipe animam meam. » Hic agonis exitus, cum a Christo Domino, certaminis præside, in cœlum ducta est.

II. Dei adiutorium. Nam, ut ait S. Augustinus, serm. CV. de temp. « Adjuvat certantes, qui certamen indixit. Non te sic spectat Deus in agone certantem, ut populus solet athletam. Clamore enim populus monet athletam, adjuvare non novit. Coronam parare potest, qui indixit certamen, vires tamen subministrare non potest. Deus autem quando spectat certantes suos, adjuvat eos certantes et invocantes. Nam vos athlete ipsius est Psal. XCIII. Sic dicebam : *Motus est pes meus, misericordia tua Domine adjuvabat me.* » Sic August. Sane David adversus Philisthæum venit non tam in suo robore et joculandi peritia quam in Dei nomine et præsidio confidens. Unde ait : *En venis ad me gladio et hasta et clypeo; ego autem venio ad te in nomine Domini.* Cum enim nos dæmon non tam propter nos, quam propter Deum oderit ac persequatur, fieri non potest, ut nos deserat Deus in conflictu quem pro ipsius honore et causa tuenda suscepimus. Itaque primo sui indigentibus, quos periclitari videt, mittit angelum suum, qui eis opem ferat, cujus exemplum refertur in prato spirituali Joan. Moschi ad Sophron. cap. LXVI. de abbate Theodosio, qui priusquam ad vitam solitariam transisset, factus in extasi, aspexit virum, cujus species claritatem solis vinceret. Hic tenens manum ejus : *Veni, ait, quia pugnare et luctari te convenit,* et induxit eum in theatrum plenum viris ex una parte candido amictu, ex alia vero nigre vestitis. Cum ergo iniecisset eum in theatrum, aspexit Theodosius virum mire magnitudinis Æthiopem, cujus caput turpissimum penetrabat nubes. *Cum hoc,* ait ille juvenis, *luctari te oportet.* At vero Theodosius ad hæc tremore ac pavore plenus : *Quis hominum,* inquit, *mortali conditione et infirmitate circumdatus cum hoc luctari posset? Non ipsum universum genus hominum si in unum confluat, huic resistere prævalet.* Ait autem ad illum juvenis ille : *Prorsus cum illo te luctari opus est : ingredere igitur cum omni alacritate et fiducia. Mox enim ut tu illum adorsus fueris, ego adiutor ero, tibi que victoriæ coronam reponam.* Ut ergo ad certamen est ingressus luctari que cepit, adfuit continuo juvenis Theodosio et coronam porrexit. Æthiops porro cum nigro suo agmine illico disparuit : pars vero candidatorum victori congratulata est. Deinde, fidelis Deus non patitur nos tentari supra id quod possumus, I. Cor. X. Si enim figulus, ut ait S. Ephrem, serm. I. de pat.

